

PRAVILNIK

O KRITERIJIMA ZA UPUĆIVANJE OSUĐENIH LICA NA IZDRŽAVANJE KAZNE ZATVORA

Član 1.

Ovim Pravilnikom se uređuju kriteriji za upućivanje osuđenih lica na izdržavanje kazne zatvora u Zavodima za izvršenje krivičnih sankcija, pritvora i drugih mjera Bosne i Hercegovine (u daljem tekstu: Zavod), ili u drugim institucijama koje su utvrđene kao najpogodnije za ostvarivanje kazne zatvora.

Član 2.

Druge institucije u smislu člana 1. ovog Pravilnika su institucije iz člana 203. Zakona Bosne i Hercegovine o izvršenju krivičnih sankcija, pritvora i drugih mjera ("Službeni glasnik BiH", broj 13/05 u daljem tekstu: Zakon), odnosno institucije koje odredi Ministarstvo pravde Bosne i Hercegovine (u daljem tekstu: Ministarstvo pravde BiH).

Član 3.

Sve dok Bosna i Hercegovina ne bude imala Zavode predviđene ovim zakonom, Sud Bosne i Hercegovine (u daljem tekstu: Sud BiH), pojedince može pritvoriti u pritvorske jedinice zavoda bilo kojeg entiteta, a lica koja Sud BiH osudi na zatvorsku kaznu, svoje kazne mogu izdržavati u entitetskim zavodima.

Član 4.

Nadležni organi entiteta i Brčko Distrikta za izvršenje krivičnih sankcija, pritvora ili drugih mjera će omogućiti najviši nivo saradnje sa Ministarstvom pravde BiH, Sudom BiH i Tužilaštvom BiH, u provedbi pravne pomoći i službene saradnje u izvršavanju kazni zatvora i drugih sankcija.

Član 5.

Lica prema kojima se izvršavaju krivične sankcije, pritvor i druge mjere zadržavaju sva prava, a lišavaju se prava ili se ograničavaju u pravima samo u granicama neophodnim za ostvarivanje cilja zbog kojeg su izrečene, a u skladu sa Zakonom i međunarodnim ugovorom.

Član 6.

Izvršenju krivične sankcije, pritvora i drugih mjera pristupa se kad postane pravomoćna odluka kojom su one izrečene, te ako za to nema zakonskih smetnji.

Sa izvršenjem krivične sankcije ili druge mjere može se otpočeti i prije nego što je postala pravomoćna odluka kojom je sankcija ili mjera izrečena samo ako je to zakonom posebno predviđeno.

Član 7.

Kada su ispunjeni uslovi da se pristupi izvršenju krivične sankcije, pritvora ili druge mjere, Krivično odjeljenje Suda BiH obavezno je preduzeti potrebne radnje da se izvršenje sankcije provede bez odgađanja u skladu s odredbama Zakona i ovog Pravilnika.

Izvršenje može biti odgođeno samo u slučajevima i pod uslovima predviđenim zakonom.

Član 8.

S ciljem osiguranja izvršenja kazne zatvora, predsjednik Krivičnog odjeljenja Suda BiH vrši upućivanje osuđenog lica, a ukoliko ocijeni da bi to lice, koje ima putnu ispravu, odlaskom u inostranstvo moglo osujetiti izvršenje kazne, tražit će od nadležnog organa da mu oduzme putnu ispravu do izvršenja kazne.

O oduzimanju i zadržavanju putne isprave izdaje se potvrda.

Član 9.

Lice prema kojem se primjenjuje krivična sankcija, mjera pritvora ili druga mjera ne plaća troškove izvršenja, osim troškova novčane kazne, kao i drugih troškova, u skladu sa Zakonom.

Za podneske, službene radnje, rješenja i druge akte u vezi sa izvršenjem sankcija ne plaća se taksa.

Član 10.

Upućivanje pravomoćno osuđenih lica na izdržavanje kazne zatvora u Zavode ili druge institucije iz člana 1., 2. i 3. ovog Pravilnika, vrši se na način i po postupku utvrđenom u članu 114. Zakona i odredbama ovog Pravilnika.

Član 11.

Kriteriji za upućivanje pravomoćno osuđenih lica na izdržavanje kazne zatvora su: pol, životna dob, dužina izrečene kazne, ranije izdržavanje kazne zatvora, mjesto prebivališta odnosno boravišta osuđenog, vrste mjere bezbjednosti i vrste odgojne mjere.

Član 12.

Izvršavanje presude Suda BiH, će se provoditi u Zavodima iz člana 3. ovog Pravilnika u skladu sa kriterijima upućivanja iz člana 10. i 11. ovog Pravilnika, programa tretmana i unutrašnjeg kućnog reda, mjesta gdje je osuđenik upućen na izdržavanje kazne zatvora, ukoliko nije u suprotnosti sa Zakonom i donesenim podzakonskim aktima Bosne i Hercegovine.

U ostvarivanju određenih prava ili pogodnosti koja se koriste van kruga Zavoda ili upućuju na drugi zavod, primjenjivat će se zakon i podzakonski akti Bosne i Hercegovine, a samo u slučaju da određena pravna situacija nije regulisana na nivou Bosne i Hercegovine, primjenjivat će se zakon mjesta izvršenja presude.

Član 13.

Prilikom upućivanja osuđenih lica od strane Suda BiH, u kazneno-popravne zavode na području Federacije BiH, ista će se smještati u zavode prema kriterijima koji su utvrđeni u Pravilniku o kriterijima za upućivanje osuđenih lica na izdržavanje kazne zatvora ("Službene novine Federacije BiH", broj 64/03), ako nisu u suprotnosti sa Zakonom i ovim Pravilnikom.

Član 14.

Prilikom upućivanja osuđenih lica od strane Suda BiH, u kazneno-popravne zavode na području Republike Srpske, ista će se smještati u zavode prema kriterijima koji su utvrđeni u Pravilniku o kriterijima za upućivanje osuđenih lica na izdržavanje kazne zatvora ("Službeni glasnik Republike Srpske", broj 65/02), ako nisu u suprotnosti sa Zakonom i ovim Pravilnikom.

Član 15.

Zatvorenik koji za vrijeme izdržavanje kazne zatvora duševno oboli ili pokazuje teške psihičke smetnje smjestit će se u zdravstvenu ustanovu.

O smještaju u smislu stava 1. ovog člana odlučuje ministar pravde BiH, na prijedlog upravnika Zavoda, a na osnovu obrazloženog mišljenja stručnog tima ljekara koji imenuje ministar pravde BiH.

Osuđeno lice ostaje u zdravstvenoj ustanovi, dok ne prestanu razlozi za smještaj a najduže do isteka kazne zatvora, osim ako je u skladu s odredbama odgovarajućeg zakona doneseno neko drugo rješenje.

Član 16.

Ako je zatvorenik izdržao 1/2 kazne zatvora i koristi godišnji odmor u krugu porodice, može podnijeti molbu za premještaj u drugi zavod u entitetu u kojem ima prebivalište, odnosno boravište.

O premješčaju zatvorenika odlučuje ministar pravde BiH uz pribavljeno mišljenje Zavoda.

Ako je molba podnesena prije roka iz stava 1. ovog člana, odbacit će se kao preuranjena.

Ako je molba odbijena, nova molba može se podnijeti po proteku šest mjeseci od dana pravomoćnosti rješenja.

Protiv rješenja iz stava 1. ovog člana može se uložiti žalba Ministarstvu pravde BiH u roku od tri dana od dana prijema rješenja.

Član 17.

Upravnik zavoda može predložiti premještaj zatvorenika u drugi zavod u entitetu u kome zatvorenik ima prebivalište, odnosno boravište radi efikasnije realizacije tretmana ili kada je to neophodno iz bezbjednosnih razloga.

Ministar pravde BiH može donijeti odluku o premješčaju i bez prijedloga upravnika Zavoda.

Troškove premješčaja snosi Zavod.

Član 18.

Žalba na rješenje kojim se dozvoljava premještaj, shodno odredbama ovog Pravilnika, ne zadržava izvršenje rješenja.

Rješenje po žalbama iz stava 5. člana 16. ovog Pravilnika, je konačno i protiv njega se ne može pokrenuti upravni spor.

Član 19.

Pritvor određen rješenjem Krivičnog odjeljenja Suda BiH, izvršava se u Posebnom pritvorskom odjeljenju Zavoda ili u posebnom zavodu za mjeru pritvora (Odjeljenje državnog pritvora pri Sudu BiH), ili u pritvorskoj jedinici bilo kojeg entiteta.

Član 20.

Pritvorenik koji za vrijeme izdržavanja kazne zatvora duševno oboli ili pokazuje teške psihičke smetnje, smjestit će se u zdravstvenu ustanovu.

O smješčaju u smislu stava 1. ovog člana odlučuje Sud, na prijedlog upravnika zavoda a na osnovu obrazloženog mišljenja dva ljekara, od kojih je jedan psihijatar.

Pritvorenik ostaje u zdravstvenoj ustanovi dok ne prestanu razlozi za smješčaj, a najduže do isteka vremena pritvora, osim ako je u skladu s odredbama odgovarajućeg zakona doneseno neko drugo rješenje.

Član 21.

Prema odredbama Zakona i ovog Pravilnika, izvršavat će se i pravomoćne odluke inostranih sudova za djela predviđena zakonom Bosne i Hercegovine, ako posebnim zakonom Bosne i Hercegovine ili međunarodnim ugovorom, čiji je potpisnik Bosna i Hercegovina, nije drugačije određeno.

Član 22.

Prema odredbama Zakona i ovog Pravilnika, izvršavaju se i krivične sankcije, pritvor i druge mjere izrečene od strane Suda BiH, stranim državljanima i licima bez državljanstva, osim ako posebnim zakonom Bosne i Hercegovine ili međunarodnim ugovorom čiji je potpisnik Bosna i Hercegovina, nije drugačije određeno.

Član 23.

Prema odredbama Zakona i ovog Pravilnika a na zahtjev osuđenog lica, izvršit će se i sankcije izrečene u entitetskim sudovima za djela predviđena Krivičnim zakonom Bosne i Hercegovine ("Službeni glasnik BiH", broj 3/03, 32/03, 37/03, 54/04 i 61/04).

Član 24.

Kazeno-popravni zavod odnosno odjeljenje kazeno-popravnog zavoda će odmah a najkasnije u roku od tri dana od dana prijema pogrešno upućenog osuđenog lica, to lice uputiti u odgovarajući kazeno-popravni zavod, odnosno odjeljenje, u skladu sa kriterijima utvrđenim ovim Pravilnikom, o trošku suda.

Član 25.

Ovaj Pravilnik stupa na snagu danom donošenja, a objavit će se u "Službenom glasniku BiH".

("Službeni glasnik BiH", broj 13/05), ministar pravde Bosne i Hercegovine, donosi